



# Халқ сўзи

Ўзбекистон —  
келажаги  
буюк  
давлат

1991 йил 1 январдан чиқа бошлаган • WWW.XS.UZ • E-mail: Info@xs.uz • 2017 йил 12 октябрь, № 205 (6899) Пайшанба

Сайтимага ўтиш учун QR-коднинг телефонингиз орқали сканер қилинг.



## МДХНИНГ СОЧИ САММИТИ

Ўзбекистон Республикаси Президенти Шавкат Мирзиёев 2017 йил 10-11 октябрь кунлари Россия Федерациясининг Сочи шаҳрида бўлиб ўтган Мустақил Давлатлар Ҳамдўстлиги Давлат раҳбарлари кенгаши мажлисида иштирок этди.



Саммитнинг асосий тадбирлари 11 октябрь кuni бўлди.

Сочидаги Халқаро конгресслар марказида Ўзбекистон Республикаси Президенти Шавкат Мирзиёевни Россия Федерацияси Президенти Владимир Путин кутиб олди.

Дастлаб МДХ давлат раҳбарлари тор доирада учрашув ўтказди. Унда Ҳамдўстлик доирасидаги ҳамкорликни янада мустаҳкамлаш, ушбу халқаро тузилма фаолиятини такомиллаштириш масалалари муҳокама қилинди, минтақавий ва халқаро масалалар юзасидан фикр алмашилди.

Мустақил Давлатлар Ҳамдўстлиги 1991 йил 8 декабрдаги МДХни тузиш тўғрисидаги битим ҳамда 1991 йил 21 декабрдаги мазкур битимга протокол асосида ташкил қилинган. Ушбу халқаро тузилмага Ўзбекистон Республикаси, Озарбайжон Республикаси, Арманистон Республикаси, Беларусь Республикаси, Қозоғистон Республикаси, Қирғизистон Республикаси, Молдова Республикаси, Россия Федерацияси, Туркманистон, Тожикистон Республикаси ва Украина аъзо ҳисобланади. Ижроия кўмити МДХнинг ижро этувчи, маъмурий ва мувофиқлаштирувчи идорасидир.

Ўзбекистон МДХ доирасидаги кўп томонлама ҳамкорликда фаол иштирок этиб келмоқда. Бу аъзо мамлакатлар билан турли соҳалардаги алоқалар ривожига ҳисса қўшмоқда.

Президентимиз Шавкат Мирзиёев Ўзбекистон Ҳамдўстлик мамлакатлари билан савдо-иқтисодий, инвест-

тиция, транспорт, туризм, илм-фан, таълим ва хавфсизлик соҳаларидаги ҳамкорликни ривожлантиришдан манфаатдорлигини таъкидлади. Йил бошидан буён мамлакатимиз билан МДХ давлатлари ўртасидаги товар айирбошлаш ҳажми 20 фоиз ўсган.

Ўзбекистон тузилмадаги иштирокини янада фаоллаштиради. Шу йил 3 ноябрь кuni пойтахтимизда МДХ Ҳукумат раҳбарлари кенгаши йиғилиши ўтказилади.

Давлатимиз раҳбари аъзо мамлакатлар ўртасида ўзаро ишонч ва ҳамкорликни мустаҳкамлаш, Ҳамдўстлик доирасида янги, аниқ лойиҳаларни ишлаб чиқиш ва амалга ошириш зарурлигини қайд этди.

Транспорт ва коммуникациялар ҳамкорлигининг стратегик муҳим йўналиши ҳисобланади. Ўзаро интеграцияланган транспорт тизимларини ривожлантириш, Ҳамдўстлик минтақасининг улкан транзит салоҳиятидан тўла фойдаланиш барча учун манфаатли. Маъмурий жараёнларни такомиллаштириш ва ўзаро имтиёзлар бериш бу борада муҳим аҳамият касб этади.

Туризм соҳасидаги имкониятлар ҳам тўла ишга солинмагани, бу имкониятларни таҳлил қилиш ва аниқ чора-тадбирлар ишлаб чиқиш зарурлиги таъкидланди.

Афғонистондаги вазиятга ҳам эътибор қаратилди. Жиноий даромадларни легаллаштириш, коррупция, терроризм, наркобизнес каби хавф-хатарларга қарши биргаликда

курашиш масалалари муҳокама қилинди.

МДХга раислик қиладиган навбатдаги мамлакат масаласи кўриб чиқилди. Умумий қарорга мувофиқ, 2018 йилдан ушбу халқаро тузилмага раислик Тожикистон Республикасига ўтди.

Президентимиз Шавкат Мирзиёев шу муносабат билан Президент Имомали Раҳмонни табриқлади ва ушбу масъулиятли вазифани бажаришда муваффақиятлар тилади.

Давлат раҳбарлари музокараларни кенгайтирилган таркибда давом эттирди.

Мажлисда Ҳамдўстлик мамлакатларининг Парламентлараро ассамблеяси фаолиятини такомиллаштириш, Ташқи ишлар вазирлари кенгаши ва Иқтисодий кенгашини ривожлантириш, келгуси йилларда МДХнинг маданий пойтахтларини белгилаш каби масалалар муҳокама қилинди.

МДХга аъзо мамлакатлар давлат раҳбарларининг Оила институти ва аъёнанив оилавий кадрларни қўллаб-қувватлаш бўйича баёноти, Ҳамдўстликда 2019 йилни Китоб йили, 2020 йилни 1941 — 1945 йиллардаги улғу Ватан урушида қозонилган ғалабанинг 75 йиллиги йили, деб эълон қилиш ҳақида қарор қабул қилинди.

Ҳамдўстлик мамлакатларининг жиноий даромадларни легаллаштириш, терроризм ва қирғин қуролларни тарқатишни молиялаштириш, коррупцияга қарши курашиш соҳаларидаги

ҳамкорлигига доир концепциялар маъқулланди.

Шунингдек, МДХ мамлакатлари ўртасидаги ҳамкорликни мустаҳкамлашга қаратилган яна қатор ҳужжатлар қабул қилинди.

Саммит доирасида Ўзбекистон Республикаси Президенти Шавкат Мирзиёев билан Россия Федерацияси Президенти Владимир Путиннинг учрашуви бўлиб ўтди.

Шавкат Мирзиёев ушбу учрашувдан мамнунигини билдириб, Ўзбекистон билан Россия ўртасидаги стратегик шериклик ва иттифоқчилик муносабатлари аниқ амалий мазмун билан бойганини алоҳида таъкидлади.

Владимир Путин Шавкат Мирзиёевни Сочида ташири билан қутлаб, Ўзбекистон Республикаси Президентининг жорий йил апрель ойида Россияга давлат ташири чоғида эришилган келишувлар изчил амалга оширилаётгани ва бу ўз самараларини бераётганини қайд этди.

Ўзбекистон билан Россия ўртасидаги ҳамкорлик 2004 йил 16 июнда имзоланган Стратегик шериклик тўғрисидаги шартнома, 2005 йил 14 ноябрда имзоланган Иттифоқчилик муносабатлари тўғрисидаги шартнома асосида изчил ривожланиб бормоқда. Мамлакатларимиз БМТ, ШХТ, МДХ каби халқаро тузилмалар доирасида ҳам самарали ҳамкорлик қилиб келмоқда.

Ўзбекистон Президентининг Россияга давлат таширидан сўнг ўтган қисқа даврда ўзаро алоқалар сези-

ларли фаоллашди. Ҳамкорлик доирасига янги соҳалар қўшилди. Кейинги ойлarda ҳукуматлараро ва ҳудудлараро даражада бир қанча таширлар амалга оширилди.

Россия Ўзбекистоннинг муҳим савдо-иқтисодий шерикларидан. Мамлакатимизда Россиянинг етакчи компания ва банклари иштирокида йирик инвестиция лойиҳалари амалга оширилмоқда. Экспорт ва импортнинг барча кўрсаткичлари бўйича ўсиш кўзатишмоқда. Йил бошидан буён ўзаро товар айирбошлаш ҳажми 3 миллиард доллардан ошган.

Яқинда Тошкентда бўлиб ўтган Ўзбекистон — Россия бизнес форумида икки мамлакат ишбилармонлари кўплаб истиқболли келишувларга эришди.

Саноат ва қишлоқ ҳўжалиги тармоқлари ўртасида кооперация кўчяётгани, бизнес вакиллари ҳамкорлиги кенгаётгани, халқларимиз ўртасидаги маданий-гуманитар алоқалар мустаҳкамланиб бораётгани таъкидланди. Москва ва Бутун Рус Патриархи Кириллнинг Ўзбекистонга ташири ҳам халқларимиз ўртасида дўстлик ва ўзаро англашувни мустаҳкамлашга хизмат қилгани қайд этилди.

Учрашувда икки томонлама ҳамкорликни янада ривожлантириш масалалари муҳокама қилинди. Томонларни қизиқтирган минтақавий ва халқаро масалалар юзасидан фикр алмашилди.

Ўзбекистон Республикаси Президенти Шавкат Мирзиёев билан

Беларусь Республикаси Президенти Александр Лукашенконинг учрашуви бўлиб ўтди.

Шавкат Мирзиёев давлат раҳбарларининг 2016 йил Самарқандда ўтган учрашувидан кейин Ўзбекистон ва Беларусь муносабатлари фаоллашгани, ўзаро савдо айланмаси сезиларли ошганини таъкидлади. Икки мамлакат иқтисодий ёти бир-бирини тўлдирши, қишлоқ ҳўжалиги, тўқимачилик, машинасозлик, озик-овқат саноати ва бошқа соҳаларда фойдаланилмаган катта имкониятлар мавжудлиги қайд этилди.

Александр Лукашенко Беларусь Ўзбекистон билан ҳамкорликни ҳар томонлама ривожлантиришдан манфаатдор эканини таъкидлади.

Беларусь Ўзбекистонга Марказий Осиёдаги муҳим иқтисодий шерик сифатида қарайди. Мамлакатларимиз ўртасидаги муносабатлар дўстлик ва ўзаро манфаатдорлик тамойиллари асосида ривожланиб бормоқда.

Қўшма корхоналар ташкил этиш, савдо уйлорини кенгайтириш, хом ашёни чуқур қайта ишлаш бўйича ҳамкорлик қилиш масалалари муҳокама қилинди.

Президентимиз Шавкат Мирзиёев Беларусь Президентини Александр Лукашенкони Ўзбекистонга тақлиф этди.

Анвар САМАДОВ,  
ЎЗА махсус мухбири,  
Тошкент — Сочи — Тошкент

Сарвор ҲОМОНОВ олган сурат.

## ДЕПУТАТЛАР ЁШЛАР, АЁЛЛАР БИЛАН МАНЗИЛЛИ ИШЛАШНИ КУЧАЙТИРИШ ВА ОИЛА ИНСТИТУТИНИ МУСТАҲКАМЛАШНИНГ ДОЛЗАРБ МАСАЛАЛАРИНИ КўРИБ ЧИҚДИЛАР

Маълумки, жорий йилнинг 12 июль кuni Ўзбекистон Республикаси Президенти Шавкат Мирзиёев парламент палаталари, сиёсий партиялар, Ўзбекистон экологик ҳаракати фаолиятини таҳлил қилишга бағишланган видеоселектор йиғилишида ёшлар, оилалар ва аёллар билан олиб бориладиган ишлар доимо давлатимизнинг диққат-эътиборида эканлигини алоҳида таъкидлаб ўтди. Шундан келиб чиққан ҳолда, мамлакатимиз раҳбари Олий Мажлис Қонунчилик палатасида ёшлар масалалари бўйича, шунингдек, оила ва аёллар масалалари бўйича комиссияни тузиш мақсадга мувофиқ эканлигини қайд этди.

### ОЛИЙ МАЖЛИС ҚОНУНЧИЛИК ПАЛАТАСИДА

Таъкидлаш лозимки, қонун лойиҳаларининг муҳокамаларида қатнашиш учун ёшларни жалб этиш парламент кўйи палатаси фаолиятидаги янгиликлардан бирига айланди. Ўзбекистон ёшлар иттифоқи вакиллари

Қонунчилик палатаси кўмиталари ҳузурида фаолият юритаётган эксперт гуруҳлар таркибига киритилди. Ишларнинг бундай шакли ўз самарасини кўрсатмоқда. Ёшлар хорижий тилларни яхши билдилар, халқаро тажриба-

га қизиқдилар, замонавий ахборот-коммуникация технологиялари билан ишлаш малакасига эгадилар. Буларнинг барчаси уларга Қонунчилик палатасида кўриб чиқиладиган қонун лойиҳаларини такомиллаш-

тиришга қаратилган аниқ тақлиф ва тавсиялар билан бўлиши имконини беради. Президентимизнинг тақлифларини ҳисобга олган ҳолда, депутатлар томонидан Қонунчилик палатасининг 2017 йил 11 октябрь кuni бўлиб ўтган навбатдаги мажлисида тегишли комиссияларни тузиш масаласи кўриб чиқилди.

Олиб борилаётган кенг қўламли ислохотлар натижасида, депутатлар таъкидлаганларидек, мамлакатимизда ёшларни қўллаб-қувватлаш, уларнинг ҳуқуқлари, эркинликлари ва қонуний манфаатларини ҳимоя қилиш масалаларига алоҳида эътибор

қаратилмоқда. Ўзбекистон Республикаси Президентининг ташаббусига кўра, 30 июнь мамлакатимизда Ўзбекистон Республикаси ёшлари кuni деб эълон қилинган бунинг исботидир. Бу борада тегишли қонун ҳам қабул қилинди. Шу сабабли, Қонунчилик палатасида ёшлар масалалари бўйича комиссиянинг тузилиши мамлакатимизнинг миллий бойлиги ва келажаги бўлган ёшлар билан ишларни сифатли ташкил этиш юзасидан амалга оширилаётган чора-тадбирларнинг мантикий давомидир.

(Давоми 2-бетда).

## ИСТИҚБОЛЛИ ЛОЙИҲАЛАРНИНГ ИШОНЧЛИ ПОЙДЕВОРИ

Кеча Тошкент шаҳрида Тожикистон Республикаси саноат корхоналари маҳсулотларининг миллий кўргазма-ярмаркаси очилди. Президентимиз томонидан олиб борилаётган очик, дўстона ва прагматик ташқи сиёсат узоқ-яқиндаги хорижий мамлакатлар билан самарали ҳамкорликни ривожлантириш имконини бермоқда.

### ҲАМКОРЛИК

Зотан, ўзаро ишонч ва манфаатлар ҳисобга олинган ҳолда, энг аввало, қўшни давлатлар билан яқин ҳамкорлик қилинаётгани Ўзбекистонимиз нуфузи янада ортиб, экспорт салоҳияти, инвестициявий жонивабдорлиги ошишига хизмат қилаяпти.

Дарҳақиқат, кейинги пайтда Ўзбекистон билан Тожикистон ўртасидаги савдо-саноат алоқалар юқори босқичга кўтарилди, азалий икки дўст халқнинг иқтисодий тараққиётида янги савдо йўллари очилди. Жорий йилнинг апрель ойида Душанбе шаҳрида бўлиб ўтган Ўзбекистон Республикаси саноат корхоналари маҳсулот-

ларининг миллий кўргазмаси ҳамда мамлакатларимиз ишбилармон доираларининг бизнес форуми бу борада муҳим қадам бўлди. Мазкур тадбирлар якунида умумий қиймати 50 миллион АҚШ долларлик савдо шартномалари ҳамда инвестиция битимлари имзоланди.

Тошкент шаҳрида иш бошлаган Тожикистон Республикаси саноат корхоналари маҳсулотларининг миллий кўргазма-ярмаркаси ушбу йўналишдаги ҳамкорликка янгича мазмун бағишлаши кутиляпти.

(Давоми 2-бетда).





